

四庫全書

集部

欽定四庫全書

集部

廣成集卷一至三

詳校官國子監司業臣納麟寶

檢討臣何思鈞覆勘

總校官庶吉士臣何思鈞

校對官中書臣嵇承志

謄錄監生臣劉文耀

欽定四庫全書

集部二

廣成集

別集類一 唐

提要

臣等謹案廣成集十二卷蜀杜光庭撰光庭
以道士事後蜀王建王衍賜號廣成先生後
歸隱青城山年八十五乃卒所著洞天福地
記道教靈驗記壩城集仙錄神仙感遇傳俱
別著錄道家類中宋史藝文志載光庭廣成

集一百卷又壺中集三卷通志藝文略載光
庭集三十卷今此本十二卷僅表及齋醮文
二體十國春秋所載序毛仙翁略文一篇又
瀘州劉真人碑記青城縣重修沖妙觀碑記
雲昇宮廣雲外尊師碑記三學山功德碑文
諸目皆不在集中蓋殘缺之餘已非完本也
考通鑑載蜀主以光庭為諫議大夫而集有
謝除戶部侍郎表史並不言其為此官又考

通鑑載王宗綰取寶雞岐保勝節度使李繼
岌降復姓名為桑宏志而集中賀收復隴州
表稱節度使桑簡以手下兵士歸降是宏志
又名簡而史不之及又有賀太陽當虧不虧
表稱今月一日丁未巳時太陽合虧於軫十
一度今以史志核之蜀高祖永平元年正月
丁亥朔後主乾德三年六月乙卯朔五年十
月辛未朔皆當日食而獨無丁未日蜀用胡

秀林永昌歷或其法與中國不同是可以備
叅考又其在唐末時所為王建作醮詞有稱
川主相公者有稱司徒者有稱蜀王者有稱
太師者考之於史建以西川節度同平章事
守司徒封蜀王一皆合而獨失載其太師
之號又有稱漢州尚書王宗夔鎮江侍中王
宗黯者二人皆王建養子十國春秋具詳其
官而獨不紀其嘗為漢州刺史鎮江軍節度

使又有越國夫人為都統宗侃還願詞稱俯
迫孤城遽淹旬月俄聞壁壘大破兇狂成掃
蕩之功副聖明之獎云云而史載王宗侃為
北路行營都統伐岐青泥嶺之戰侃兵大敗
為蜀主所責無功而還與所言亦全不相合
光庭駢偶之文詞頗瞻麗而多涉其教中荒
誕之說不能悉軌於正獨是五季文字缺略
集中所存足與正史互證者尚多故具錄之

以為稽考同異之助焉乾隆四十三年五月
恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

廣成集卷一

後蜀 杜光庭 撰

代陶福太保修瀆口化門額表

臣某言伏以瀆口化者即二十四化之第十八也節應配于小滿列宿應於畢星陳安世白日昇天臺蹤尚在褒女仙乘車得道轍跡猶存每歲春秋准勅祈醮頃自用軍之後併已摧殘古殿空壇僅餘基地仙儀像貌盡

翳榛蕪往來絕瞻敬之門士庶無歸依之所豈期福地
一旦蕭條臣輒備興修願資聖壽伏惟陛下軒帝靈源
緱山仙緒繼天御極用道臨民萬方榮廣覆之慈三教
被維新之澤芝田崇苑咸荷精嚴古廟儒宮亦蒙繕飾
况是長生之教敢申崇葺之儀旋以翦薙蒿萊興營宇
室像設免嗟於暴露簪冠克遂於焚修邈彼靈蹤還為
勝概香燈有託齋醮無虧兼召道士楊玄敬獨孤知元
何某等三人就觀居住訖但以荒涼既久門額全無敢

祈雨露之恩特飾神仙之境某等伏乞聖慈依瀆口舊
名仍賜給聖壽額許臣自製造懸挂庶使琅書銀榜長
懸日月之輝漢水仙山永祝聖明之壽臣某無任之至

謝新殿修金籙道場表

臣某言伏覩聖旨與右街威儀何冲徽等二十一人於新
殿內修金籙道場七晝夜今月十四日開至二十日散
供奉官楊紹業依時設拜言功表贊訖者伏以天贊聖
功鼎新大內瑤軒玉砌超三島之鼇宮青瑣丹扉逾九

清之鳳闕叶皇居之壯麗觀帝宅之深嚴萬國仰瞻千
重森衛纔畢瓊宮之製先開金籙之壇鋪舒而一一精
新祇敬而重重蠲潔龍香上達依稀而萬聖俱臨蟾月
低光彷彿而十真入會進洪睿算遐永皇圖近臣拜手
以投詞宰輔齋心而瞻祝殊禎允集巨貺無涯隆大寶
於千春總八紘於一統臣等叨膺科教獲備焚修豐玉
膳於天厨躡雲庭於仙境兢榮已極頒錫洵臨伏蒙宣
賜視錢銀器足段等澤深溟海恩重嵩衡顧慙鷓鷯之

微何報聖明之獎臣無任之至

謝恩除戶部侍郎兼加階爵表

臣某言伏蒙恩勅除授光祿大夫尚書戶部侍郎上柱國蔡國公廣成先生者睿慈春煦宸翰雲敷叨榮而但覺逾涯荷渥而固知所措臣某中謝臣聞聖明在上是必授任才能俊又在官乃貴陳力就列皆以道包經濟言達變通上有致君之能下盡為臣之節處既得地用務適時苟虧利物之期必致取容之誚如臣幽懦榮奉

休明循顧庸襟敢臻殊寵伏惟陛下披圖創厯握紀繼
天明逾兩曜之懸德合二儀之普蕩滌氛垢蘇泰寰區
功宣而萬有同心化被而八紘繞指夢通巖壑股肱符
命說之求景仰烟波輔弼契非熊之兆元勳貞佐捧日
扶天人傑時英誕星降嶽青宮翼贊日月重光朱邱忠
貞盤維增永臣某江湖賤質簪褐微才為儒既昧於成
麟學道甘期於畫虎矧復辭吳歲久奉聖年深杳無山
水之思每感風雲之會歸棲照育三十餘秋施重嵩衡

遇深溟渤變枯荻為茂草起敗骨為豐肌徒曰竒功難
諧聖獎是以臣俯盈丹懇積感皇慈曉動神魂夜驚形
影効報未申於絲髮憂惶空溢於肺肝況復啓運之初
垂裳之始錫峒山之美號加北省之華資無以身諭國
之譚上裨天聽之造膝沃心之議仰副宸衷揣身世而
榮顯居多於爵位而貪饕已極豈可重塵清級使履殊
榮紹碧落之嘉稱集玄闕而瓌質且如漢推曼倩晉有
稚川未聞聯居清重之司再踐非常之秩揣量戰越進

金匱要略卷之三十一
卷一
退兢榮仰對宸嚴無階陳讓唯虔砥礪永答鴻恩臣不
任

謝恩奉宣每遇朝賀不隨二教獨引對表

臣某言伏蒙聖慈以臣每有起居稱賀皆與道衆僧人
齊班特降宣旨令臣自今以後獨入引對不隨衆例者
禮加異等事越常倫褒稱發自於聖心榮盛獨光於道
域隆恩顯示負載難勝臣某誠榮誠懼頓首頓首伏惟陛
下誕睿承天執符御歷包乾坤而覆載懸日月以照臨

炫金鏡之光華無幽不察調玉燭而亭育有物皆春由
是露灑天根澤流地表肅武功而定氛侵桀黜悛心修
文德而服要荒奸宄革面毳幕穹廬之俗水居穴處之
鄉重譯來庭占風入貢理定而樂作功成而禮行舉三
代之頽綱興百王之墜典有沿有革無黨無偏至若羣
后朝元垂衣當宁儼三傑十臣之佐冠非熊審像之賢
文物羽儀輝今映古其或雲衫羽服仰丹堦而効嵩呼
白足方袍列彤庭而申華祝此時微臣常依旅進得面

雲階每驚岩壑之微獲在烟霄之上今則迥隆睿獎頓
革前儀念臣雖迹預簪冠而身叨爵秩清級纔移於北
省華資又接於南曹特令敷奏之時不雜緇黃之侶俾
其獨引顯示優恩昔者魏重謙之梁尊貞白漢稱曼倩
秦有子平禮容靡覩於新規朝挹皆循於常度今者降
九天之明命垂萬世之宏規退省幽辱但切凌兢之感
顧慙纖弱何勝雨露之恩惟勵丹誠永酬鴻澤臣某無
任之至

謝獨引令宣付編入國史表

臣某言伏蒙垂慈特降宣旨賜臣不隨二教獨引對敷以臣謝恩表宣付史館者迥自宸衷光申異禮仍編信史永載優恩祇荷難任寵榮增極臣某中謝伏惟陛下大明御歷至聖宣功廓覆載以覃恩並曦娥而流照賢良入輔庭多命世之臣夷夏歸仁府積殊方之貢有俗皆臻於仁壽無為欲蹈於華胥由是蓬島芝宮咸加炳煥祇林柰苑畢集精嚴四靈挺質以呈休六氣調時而

表貺玄儒鼎盛緇褐同歡臣猥以常倫榮逢景運道籍
兩塵於美號官榮再履於崇班別顯殊恩賜其獨對緇
黃班裏受宣而徑上雲天鵷鷺廷中顧影而疑生羽翼
今則寵編國史昭示寰區迥隆非次之遷永載不刊之
典荒愚有素難勝雨露之恩蕭芥至微何報乾坤之德
惟虔修勵上荅聖明臣不任

賀黃雲表

臣某伏覩鴻臚卿趙溫珪奏今月二十三日皇帝為辛

得賢樓看閱將士皇太子自城南閱馬帳頭迴入城至
酉時城上有黃雲兩片狀如華蓋逡巡變為紫色者臣
謹按堯之誕生常有黃雲垂覆舜之御宇常有黃雲凝
空又漢宣帝幸甘泉宮紫雲入殿宋世祖踐祚紫雲見
於端門黃帝有瑞雲以雲紀官今者德動天休瑞呈雲
物華夷共仰海嶽同歡臣某中賀伏惟陛下體道握符
惟天縱聖仁周動植惠普寰瀛柔遠俗以文明憐匈奴
之武畧蓋以中原未泰品物未寧將申戡靜之機用拯

生靈之弊授律則南推醜蜒鑿門則北埽烟埃鐵軸牙
檣水耀龍驤之旅霜戈雪戟陸陳隼擊之師振動山川
奔驅雷電佇聞恢拓以廓乾坤爰命皇太子訓整六軍
申明三令蒙輪挾輶之士壯氣凌空拔山扛鼎之夫雄
心貫日皆堅金石咸勵忠貞允合天心果昭靈貺輪困
對起蕭索齋疑成金柯玉葉之竒高浮帝座變紫蓋如
葩之狀低接皇城初呈陰鼎之姿漸結臨關之色有以
見玄穹贊祐皇德升聞越唐堯虞舜之徵超宋祖漢宣

之感自此率賓八極文軌萬方增聖壽於億千固宏基
於隆永臣躬深睿獎疊覩殊祥敢謠詠以抒愉誠効謳
訶而頌聖德詩一首陳進

賀雅州進白鵲表

伏覩嚴道縣多功團崇善里百姓李彥韜於楠樹生獲
白鵲進獻者五行表瑞見金運之隆昌百辟同瞻賀玉
京之胎脫臣其中賀臣聞王者正名立訓體乎天意勝
殘去殺慰此人心則有異木珍禽來儀朝闕霜毛動色

紺趾標奇斂羽呈姿應見徒誇於漢魏傳聲送喜翱翔
顯奉於皇明伏惟陛下瑞冠百王功超三古協序而風
調禹律燭昏而鏡滿軒臺享壽萬方再樹乾坤之本照
臨下土重懸日月之光鄙炎漢之息肩邁唐堯之鼓腹
人訶歲稔物賴時康况乃萬旅貔貅千營鎧甲擒兇翦
弊撫弱字孤雷掀鉦鼓之行雲黯旌旂之舉發令而雄
豪踴躍申息而疲瘵昭蘇五星運度以垂休八海承風
而寢浪遂至山河効祉禽羽呈祥遠離海上之巢來對

雲中之闕觀其玉籠乍啟雪姿不驚望聖苑以徊翔對
天慈而鼓舞往來瑤陛棲泊珠簾認素羽以難分聽新
聲而已熟不是成橋之侶殊非繞樹之羣既彰團雪之
容實煥來金之盛佇見干戈載止奸邪屏除蕩疆場之
烟烽永歸北極靜寰區之榛梗自我西方信超魏德之
雄更掩漢成之代臣獲逢昌運累覩殊祥輒陳詩頌之
詞上浼聖明之鑒臣謹課頌聖德紀瑞詩一首陳進干
瀆冕旒無任之至

賀天貞軍進嘉禾表

臣某伏觀天貞軍留後崔善進謝洪縣百姓王友田上
嘉禾合穗圖者聖德遐邇祥符疊致文武瞻覩中外歡
呼臣某謹按瑞圖云嘉禾者美瑞也稔歲精王者德至
於土則兩苗同秀昔者唐叔得禾異畝同穎成王問周
公曰二禾一穗意天下和同乎王命唐叔作嘉禾篇由
是九土會同八紘歸化旅獒西貢越雉南來三十世之
宏基七百年之大業輝前映古逾夏掩商今在聖明復

彰斯瑞伏惟陛下紹軒皇之聖緒承周帝之洪源應歷
數以配天總華夷而類帝惟恭惟儉絕嗜音甘酒之娛
乃聖乃神有明目達聰之美弘武德而先懲不軌電掃
奸妖播文風而旋撫戎羌雲奔琛賫憂勤黎獻軫憫耕
農歲致豐穰田無災潦德通於地見共秀於二苗應達
乎天果異畝而同穎契聖祖興周之瑞表吾君拓土之
徵昔則和天地於一同今則包萬方為一統况屬王師
薄伐誓衆弔民雄稜已懾於彼方禎異先呈於近境佇

金史卷一百一十五
卷一
觀收尅永蕩氛靈開九天日月之光顯符周卜合四海
生靈之望同彼唐禾臣竊仰瑞圖賡嘏聖德願預採詩
之錄思陪唐叔之篇謹課誦聖德嘉禾合穗詩一首陳
進

請駕不巡幸軍前表

臣某伏覩宣旨駕幸北路軍前者臣聞展義巡方禮經
垂典誅克伐叛有國通儀益欲迴廣照於一方輯五瑞
於羣后翦其暴亂慰彼蒸黎況蠢爾邠岐久迷大順匪

朝伊夕即覩殄平不足以親駕戎車遠臨狡穴顯顯衆
懇僉用驚疑伏惟陛下逾舜文明超周神武稟秋霜之
令敷春育之恩委以至公推其大信覆載之內風偃化
行而隴渭之鄉岍岐之俗甘寒谷之氣自棄陽和息惡
木之陰顯孤臨照恃蟻封而稱固巢燕幕以偷安今則
上將專征雄師薄伐遠憑宸算必剋根莖竊惟漢曲褒
川方當寒沍霜邊嶮棧豈易躋登况射鮒穿蠅詎用千鈞
之弩孤城荒堞寧銷萬乘之威伏乞聖慈俯徇羣心特

寢成命佇觀克捷永統華夷干冒宸嚴無任戰越兢懼
迫切屏營之至謹詣閣門表奉陳謝以聞

第二上表

臣某伏覩宣旨駕幸北路軍前皇太子宰臣百官等上
表陳請未賜俞允者省問方俗雖經典之舊儀慰撫師
徒乃君父之慈照但以道途險阻水陸嚴凝遐邇羣心
實切憂灼伏惟皇帝陛下體堯慈惠逾舜欽明欲令寰
海之人盡沐雍熙之化憬茲汧隴密邇封隅久負歡盟

深辜恩信識變通者已東身効順迷向背者猶掩耳偷
安致一境之生靈銜積年之怨抑洵吠堯而有日思慕
舜以無由所以授姜鉞以整師築韓壇而誓衆風馳號
令雨驟雄豪上將等威振雷霆心堅鐵石指期尅日必
就削平豈勞親駕翠輿躬麾白羽六龍八馬馳驅嶮棧
之中萬騎千官迢遞層峰之外方零霜雪漸逼沍寒伏
乞聖慈俯聆億兆之情特駐省方之命上為宗社下慰
華夷佇對捷書更開土宇臣叨深睿獎倍慊明誠塵浼

宸嚴不任待責望恩迫切禱祈之至

謝恩賜興聖觀弘一大師張潛修造表

臣某伏奉恩敕宣賜左街興聖觀弘一大師張潛令修葺住持者寵自宸衷榮臻道域簪裳增忭芝木騰輝臣其中謝伏惟陛下道均軒后聖並放勳凝懷於姑射之峰寄夢於華胥之境睠言人教理契生津栖神泯合於無為屬念潛期於有德化含清淨善利邦家觀宇蕭條像設塵翳爰敷綸渥載俾葺崇伏以前件觀地接玉清

昔為道學尋改貞元之宇復標紫極之宮至德年中易
名興聖前臨廣陌東距錦江宛是靈墟實惟勝所况門
庭具設像貌儼存誠歷代之仙蹤乃皇都之福地今則
重加繕飾盡撤葦腥拂塵埃於湫隘之中還瞻玉相蕩
瓊甃於蒿榛之內別築瑤壇洒雨露而騫拊增榮薦沉
麝而睟容伊穆張潛等精專剖劂恪勵住持夕磬晨鐘
祝遐常於聖壽朝香暮燭期隆永於皇圖臣某獲列教
門躬榮睿澤不任之至

謝恩宣賜衙殿點鐘表

臣某伏蒙聖旨宣賜衙殿前點鐘一口於日院內充齋
醮扣擊者恩垂霄漢榮及簪裳扑躡無階輝華增極伏
惟陛下二儀覆燾三景照臨澤浸無涯惠敷有截故得
八溟息浪長鯨將殄於昌時五緯循常巨彗欲銷於永
夕削平夷夏倒戢干戈而復俯軫皇情留慈玄教致感
應於洞府得應見於靈仙固當齊聖壽於日月星辰隆
寶祚於乾坤海嶽今者念臣院宇之內篋篋未全每於

齋醮之辰尚闕春容之響既之通真之器莫諧集聖之儀輟瑤階泛日之音來從天上須豐嶺含霜之韻降在人間事超錫樂之榮恩重點鐘之賜永當炷焚芝朮禱祝真靈冀啓禎休仰酬聖獎所宜賜鐘臣謹以焚香祇受訖不任

謝恩賜玉局化老君表

臣某言伏奉恩勅宣賜舊玉局洞門石像老君歸龍興觀御容院閣下西間奉安供養其蓋石舍一區移拆就

觀起立并賜錢設齋道衆將幡花引歸觀表讚等者皇
澤霽臨玄門增耀康莊改觀道俗同歡臣某中謝伏惟
陛下法道披元垂衣運化暢清靜無為之理敷希夷不
宰之功已洽大寧將臻一統以玄元像貌密邇宸居雖
香燈無曠於常儀而供養合歸於法宇爰申明命豐備
齋羞焚蘭木以飄香森幢幡而成列鏡金鳴玉纒離象
闕之庭雲邁風行遽入龍興之閣羣心瞻仰萬衆歡隨
雷喧讚悅之音霧集聖明之像臣與道衆等獲栖大教

疊荷隆恩永勵修持上酬睿獎不任之至

賀收隴州表

臣某伏覩北面軍前隴州節度使桑簡以手下兵士及
城池歸降收復隴州者睿算遐宣元勳効節纔申薄伐
已復雄城臣某中賀伏惟陛下聖邁黃軒威超周武運
神機於掌內動有成功料勅敵於穀中舉無遺策自岐
郊負義關外隲盟深辜敦好之儀遽絕睦隣之分擁豺
狼之一旅恃疆土於三州巢折葦以偷安坐積薪而稱

固小不事大春秋所誅所以義士盱衡謀臣扼腕皆期
殄掃遂舉戈矛六軍奮躍以爭先八校喑鳴而致勇蹴
土佇摧於吳岳飲馬將竭於渭流桑簡以智合變通心
明向背倒戈銜璧効命投誠獻千里之山河不施寸刃
復一方之戶口無損秋毫便回亳社之鋒自收商受之
衆想回中之路絕退且無歸顧灞上之讐深竄將奚適
料其元醜即見梟擒看通於八水三山永統於九州
四海俱頌舜歷盡入禹封臣獲奉昌期累觀大捷無任

之至

壽春進章真人像表

臣某伏以皇圖昭永上帝開祥北極瑤樞煥虹光而誕
睿中天玉斗飛紫電以凝華萬國歡瞻羣心增忭伏惟
陛下二儀炳靈九清集瑞至化塞乎天地清明肅於鬼
神肇三十世之宏基方隆周業興四百年之景運佇越
漢圖浸德澤於玄儒鼓薰風於夷夏今屬壽春大節祝
聖昌辰琛賚雲馳梯航波委咸修芹禮以繼山呼臣與

當院道士等虔拂華壇精依祕格諷琅書寶軸披霧韜
霜羅克嚴蠲潔之誠永廣乾坤之福鑒聖真人昔師道
祖躬受靈篇傳真紀於先天緘瓊文於福地豫明皇業
洞達玄樞嵩公之識神堯真白之知梁武以之校美詎
可同年是敢藻績縑繒式資瞻仰庶因焚炷克嗣禎休
干冒宸嚴臣無任祝聖虔切屏營之至其畫像功德數
等謹詣閣門奉進以聞伏聽勅旨

黃萬祐鄧百經賜紫衣師號謝恩表

臣某伏覩恩勅夔州道士黃萬祐賜紫衣仍師號羅江
縣道士鄧百經賜紫者大聖御天神功及物庭有賢良
之侶野無遺逸之人率土朝宗允當聖日臣其中謝伏
以黃萬祐等林泉得志麋鹿為羣深處巖蘿固窺名利
或丹華救物有回生駐景之能朱篆誅邪有蕩魅除兇
之効皆張道用潛贊明時遽捧鶴書來朝鳳闕萬祐既
趨於錦水百經自至於羅江共仰堯天俱榮舜澤歷觀
前史莫得比倫伏惟陛下道邁唐堯功高軒后想汾水

凝神之日尚遠九重比峒山請益之辰猶勞載駕今則
蒲車允至桂檝云來徑捨烟蘿躬朝旒宸顯封嘉號俱
錫服章美輝簡編光揚簪褐不任之至

廣成集卷一

欽定四庫全書

廣成集卷二

後蜀 杜光庭 撰

詔與黃萬祐相見謝表

臣某言伏奉宣旨令臣就內樞密院與弘道大師黃萬祐相見者天慈軫念俯及孱微荷載難勝兢榮增極臣某中謝伏惟陛下化弘有道理尚至仁憂勞普及於萬方軫念無遺於一物故得眠雲逸士遙馳向闕之心傲

世高人盡識朝天之禮弘道大師夙探至術深隱巖谷
名姓可聞儀形莫覩今者爰隨徵詔直詣闕庭捨草帶
荷裳寵紫衣師號事光史筆榮耀道門伏蒙聖慈宣
命微臣與之相見獲奉睿明之獎得瞻雲鶴之容步武
乎壺天躋昇於蓬島祇膺異渥榮耀萬生顧惟鷦鷯之
微何報乾坤之德臣某不任

奏於龍興觀醮玉局劄子

右臣先蒙今年十月二十二日宣賜舊玉局洞門官舍

一所并石像老君一座移在當觀其舍今于殿後講堂
基上起立功華便用安置石像老君焚修供養伏以名
山大川二十四化春秋常祀著玉舊儀其玉局化所修
常醮伏請起天漢元年二月八日委奉府縣祇就龍興
觀玉局石像老君前修設奠免曠闕以叶恭敬又北邙
化在雋州積年已來醮祝皆闕况居率土之內宜申咸
秩之文前件二化今亦欲就龍興觀一處與玉局同用
咸祝景貺永福聖朝謹舉如前伏聽勅旨

皇帝為太子生日設齋表

右臣伏奉聖旨為皇太子生辰宣賜莊宅庫錢六十貫
文省除於北帝院差選道衆二十一人於七月八日開
置黃籙道場七晝夜至十五日散齋者伏以紫氣充庭
青宮誕睿動歡聲於六合凝喜氣於九重凡在寰區皆
虔祝賀伏惟陛下恩周中外軫念臣僚以皇太子素切
修行常思儉約懼無名之破費使衆力之煩勞應諸司
欲有齋修並令止約頒賜內庫錢物特開仙觀壇場祈

玉京金闕之真廣宸殿離方之福美高典冊事邁古先
臣某獲奉絲綸將申焚祝忻覩惟新之寵澤鴻垂上大之
宏規不任抃蹈之至謹錄狀陳賀謹奏

詣老君殿修黃籙齋表

臣某伏奉宣旨於北帝院奉太上老君修黃籙道場三
日設齋散壇給內莊宅庫錢六十貫文省除差選道衆
二十一人行道禮懺須令精潔伏惟陛下功包五帝德
懋三皇凝旒敷有道之風端宸暢無為之化宸心密感

萬靈響應以潛通睿想遐周四海雲隨而奉聖故得乾
坤交泰日月貞華歲阜年康風恒雨若神戈所指長蛇
與封豕皆誅惠渥所覃虐魅與潛螭自屏由是仙山邃
洞休瑞繼聞玉印銅符禎祥間出今則拯橫流之難興
時雨之師將廓八溟同歸一統而猶翹心玄教讓德皇
穹於中元齋潔之期備三境香花之會上答玄元聖力
特開黃籙寶壇用臻臣福洪休克固瑤圖睿壽臣叨獲隆
獎祇奏德音唯勵精誠以虔焚祝不任荷載之至

宣示解泰邊垂謝恩表

臣某伏奉聖旨宣示東北面軍前所奏得鳳翔出歸官
健王彥劉等分析賊中事宜并有謠言泰邊垂曲子待
來年者臣某言伏以天道玄微潛司兆朕神功幽晦寔
主福祥必憑謠詠之言以告休禎之旨昔吳時竒童謠
於廣陌尋驗吳亡陳時異鳥下於高臺果彰陳滅五星
之飛洛為虞舜受國之期一馬之化龍乃元帝興王之
應斯皆發於天意感契人心詳考嘉言允歸聖德伏惟

陛下繼天誕睿應運啓圖徇億兆之樂推撫臨海嶽承昊
穹之眷命拯救生靈國寶珍符不求自至夷琛塞賚望
日爭來而猶死境負恩孤城背義坐積薪之上即致焚
燒巢折葦之端立期齏粉果見神明示讖里巷傳謠竊
聞所告之詞便主尅平之義所言邊垂者乃國家散關
民生數困久乏時雨之師神道言祥光陳後后之詠成
功克敵翹足可期即當蕩定三秦統臨萬國瑤圖寶歷
地久天長臣某獲奉天慈躬聆告語輒陳淺見干浼宸

嚴不任之至

謝宣賜天錫觀莊表

臣某伏蒙聖慈宣賜漢州通記縣天錫觀唐友則莊一
所永充常住伏惟陛下繼天受命應運垂裳鴻圖豫定
於上清寶冊遽呈於厚地鼎新觀宇允答休禎三殿之
像貌崇嚴終歲之香花精潔今則特頒睿澤廣錫莊田
輟彼膏腴永為常住皇慈迥降玄教增榮自茲日給齋
羞免有旁求之闕晨香暮燭益專焚祝之心祈聖壽之

延洪保宏基之隆永臣某叨榮聖獎躬荷殊恩不任之
至

謝恩令僧行真修丈人觀表

臣某伏覩惠進大師僧行真狀奏奉聖旨修青城山丈
人真君殿功畢者伏惟陛下恩撫萬方仁深二教祇園
蓬島咸切崇歸之慈鹿苑鼇宮俱被興修之賜爰於仙
宇特命高僧載申剏剏之功克就莊嚴之勝俄成邃殿
永鎮福庭期五山十洞之靈增彌劫齊天之壽臣獲居

玄教躬荷皇慈不任之至

宣為太子修生日道場散齋表

臣某伏以九天集貺三景凝祥動樞殿以飛光降春宮
而誕秀華夷增抃億兆同歡皇帝廣捨緡錢精崇齋福
必冀上清照鑒隆萬壽於聖躬至道貽休介千祥於儲
后克昌大寶永統九圍臣某等獲勵焚修榮頒觀錫不
任惶懼之至

謝允上尊號表

臣某伏奉恩制俞允宰臣等所上尊號者丹懇上陳皇
明下矚自天有命率土同歡中謝伏惟皇帝陛下玄鳥
誕商赤符興漢救焚拯溺神資命世之才日角月玄天
啓乘時之瑞懋宏勲而崇睿德功蓋前朝總歷數而廓
洪基祇應寶運由是三靈啟祉萬國攸歸鄙成湯周武
之君陳師用鉞笑創魏開隋之主侮寡凌孤振衣而康
濟九圍凝旒而光臨大寶承耀魄中黃之祚執招拒西
白之符握金鏡而照寰瀛人神交泰撫璿璣而觀海島

億兆樂推故得御端門而嘉氣橫軒登圓丘而神兵扈
仗謁清廟而玄雲四卷月瑩中宵鷹鴻名而白氣輕飛烟
籠廣砌麟呈沼沚龍躍江湍草樹含文雲霞絢綵金符
踴篆玉璽流光雖讓德於上玄已盈編於太史又若天
涯地表右塞南荒列奇貨於明庭貢神駒於天廐寶香
來於絕域美玉薦於殊封漢孝武之四隅請頒正朔唐
高宗之借國願混車書將復禹封更開堯土百揆時叙
六樂克和信及豚魚恩加動植矜逋已責恤獄省刑天

無入牢之星地絕成牛之氣俘囚繫頸咸蠲鈇鉞之威
孽黨臨誅特有緡錢之錫牲牲肥腴染盛潔豐敢昭事
於神明致仁賢乎紱冕達誠心於天地罄恭恪於郊禋
感無不通動叶喜應不銜奢靡不御纖華無沉湎之游
無恣瀆之惑不尚馳騁靡狗豕漁靜必肅嚴舉惟典禮
豐財和衆禁暴安人大閱以正武威大蒐以示軍實貌
貅百萬皆蒙輪拔拒之豪駭牝千羣盡驩子龍孫之駿
延獎忠孝博採器能片善無遺微功必錄專經推子激

之以高科靖節幽人縻之以好爵賞勤敦本務穡勸農
歲多栖畝之糧時豐廩實野有如雲之稼國富家肥四
隅無烽燧之勞百里有謠謠之樂星芒武將功高而武
烈洗洗獄降儒臣業瞻而儒風穆穆雖仲謀之興江表
玄德之有坤維較美籌功曾同彷彿今則關河克靜鞞
柝無誼鄰封之玉帛交馳近境之干戈載戢人歡富壽
政洽雍熙文武諸臣願增徽懿中外瀝懇華裔同辭果
回日月之光俯降允俞之詔戴圓履矩率土普天觀盛

禮而有期仰高穹而增抃臣某與道衆等不任踊躍歡呼激切之至

代人請歸姓表

臣聞磐石之宗義非他族維城之重實自本枝將垂久大之規合定親踈之分臣身秉文律識昧武經獲履戎行早塵天渥提戈擊劔惟傾報主之心北伐南征每誓勤王之節伏自皇帝陛下駕驅豪傑掃蕩寰瀛全其織芥之勞假以殊常之澤賜為骨肉列在宗祊但勵捐軀

冀酬睿造今屬以乾坤改卜天地降休土德潛移金行
啓運徇華夷之推戴副億兆之歸依端居而神器自來
遙同舜禪恭已而龍圖肇創不假周征維山之寶祚天
長淮水之瑤源地久魏我帝緒須承綿昃之宗浩蕩皇
基難雜蓬門之子循襟省已榮極增憂輒披昧死之誠
甘寘逆鱗之罪期分貴賤永叙仙凡伏乞聖慈許臣却
還本姓干冒宸嚴無任待罪望恩涕泗隕越之至

賀太陽合虧不虧表

臣某伏覩司天奏今月一日丁未巳時四刻太陽合虧
於軫宿十一度至未時四刻復圓今測驗不虧者日華
騰景君德齊尊超術歷而不虧彰睿明之通感中謝伏
惟皇帝陛下元陽誕聖二曜均明昇若木於震宮曜真
精於乾道體冬曦而流愛九有感恩比春煦以延慈三
無並照故得大明增彩推筭難窺契覆載之殊休越陰
陽之常度祥光彌盛玄德動天逾漢日之再中邁堯輝
之合璧書之青史實冠瑤圖臣獲奉昌期叨觀嘉貺退

顧桑榆之景倍傾葵藿之心不任歡躍之至

謝恩宣示修丈人觀殿功畢表

臣某言伏覩長平山惠進禪師行真奏伏惟宣旨重起
立丈人觀真君大殿功畢者聖造旁敷仙祠重創臣功
克懋靈跡增榮伏惟陛下德洽萬方惠分二教文風遐
布殊庭効柔服之誠武烈光宣異俗稟雪霜之令蓬宮
奈苑咸遂興修寰區瞻禮樂之容夷夏識玄緇之訓功
侔太古美冠前王去冬以丈人觀置立年深堂廡凋壞

命高僧而制度賜物力以興隆於是運石他山伐材幽
谷梗楠入用剗厠程能俄成大壯之功克致齊天之固
虛簷瞰日廣砌橫空雲拂危梁風生疎牖垣墉不改圖
畫如新截岡阜而豁庭除闢溝源而護階磴衝流莫及
迸石難侵遙符睿聖之慈顯此殊常之績集竒功於不
朽增聖壽以無疆臣叨列玄闈夙深皇澤唯虔焚炷上
答休明不任

宣醮夫人觀新殿安土地迴龍恩表

臣某伏奉宣旨以青城山丈人觀新殿功畢修醮安謝者伏以陛下仁周海岳澤溥儒玄翹屬靈山垂恩仙觀殿宇之凋摧既久教門之興葺無由詔命真僧頒宣國力宏麗有疑於化出巍峩遽比於神功鎮彼福承與天齊永臣獲承聖獎虔啓醮壇嚴香燭以焚修遍真靈而告謝霞峰雲壑如聆萬歲之音玉歷金符更廣千椿之壽以今月二十三日設醮訖却迴謹詣閣門奉表起居以聞

賀獲神劍進詩表

臣某言伏覩今日趙匡業所進合州江上得神劍一口
宣示中外者伏以將啓昇平祥符必降欲清兇孽神劍
斯呈昭聖明斬斷之功表天地匡扶之力伏惟陛下功超
三五威肅寰瀛仁格幽明道均天地故得山川林谷吐
金燭於層崖風雨雷霆見霜鋒於萬里一條秋水初觀
出地之姿數尺練光宛耀倚天之勢仍隱彰變化顯著
神竒昔嬴帝得之於水心果吞六合今陛下獲之於江

上即統萬方剗鐘切玉者詎可比倫斬馬斷蛇者那堪
儔擬臣榮逢昌運獲覩殊祥輒貢詠謌願揚睿感謹課
頌聖德七言四韻詩一首陳進干浼宸嚴無任之至

賀誅劉知俊表

臣某伏覩勅旨劉知俊以亮暴橫常已誅戮訖者罪惡
貫盈人神共憤允符聖斷克正嚴誅臣某誠抃誠快頓
首伏惟劉知俊性惟兇狡器本凡庸有貪狼苟且之心
無報德懷恩之志頃思危道迫歸我大朝顯敷雨露之

慈旋受節麾之寄委之非次待以不疑更隆推轂之恩
特付專征之任而咆哮自恣殘忍為懷屠害黎元罔遵
刑憲隳大國撫柔之旨辜聖朝弔伐之仁既負鴻慈難
逃顯戮伏惟陛下恩弘天地仁冠堯湯體至道以好生
布春和而照物夷蠻戎狄皆知慈育之深日月星辰共
鑒包荒之廣而知俊獨違聖造肆用淫刑致遐陬之未
通阻四方之向化今則雷霆震令斧鉞興誅使普天率
土之人荷去惡除兇之德克昌祚歷永福生靈臣獲覩

宸嚴無任歡躍快忭之至

賀鶴鳴化枯樹再生表

臣某伏覩邛州團練使張敬周奏大邑縣鶴鳴化玄一大師郭昭美申當化有古栢樹內有七株枯已多年今再生枝葉鬱茂異常州司差人覆驗有實者仙山表貺嘉樹呈祥符睿德之感通彰神功之茂育臣某誠歡誠忭稽首頓首臣按瑞圖云帝王德及草木政致昇平則松栢常生永有禎異伏惟陛下膺圖啓運握紀承天修

文化而服遐荒耀武威而平九有恩周草木惠及蚍蜉
窮蕃歎塞以歸仁擴俗梯山而納賚由是涵濡異類感
動殊倫雪兔霜禽栖翔接影應龍神蔡表見為常今者
玉洞雲峯靈墟古化當炎漢理平之際乃天師修道之
鄉林麓森踈烟霞煇絕蒼崖鮮織凌空之轍跡猶存翠
墀莎封化鶴之壇基尚在而巖前古栢枯朽多年雷雨
露以重榮吐萋苗而再茂喬柯裊翠密葉凝陰彼王廙
之豫章難偕繁盛雖瀨鄉之仙檜莫繼禎祥艷七栢之

興榮契卜年之遐永祥編瑞謀古昔無倫臣獲際昌期頻
聆嘉瑞敢陳謠詠願播寰瀛謹課頌聖德七言四韻詩
一首陳進稱賀以聞

賀西域胡僧朝見表

臣某伏以西域天竺僧到闕朝覲者天慈遐被異域懷
歸致萬里之番僧朝十年之聖主華夷率化億兆同歡
臣中賀伏惟皇帝陛下繼聖統天體元立極惠周覆載
仁匝寰區戎蠻夷狄之鄉皆遵聲教舜禹商周之德莫

繼欽明由是琛寶川馳梯航霧集貢無虛月史不絕書
今者天竺遠戎葱山賈俗在積雪流沙之外比峰岭麗
島之間遙聞干呂之雲遂起朝天之意言須重譯路想
經年崎嶇不憚於窮荒匍匐願瞻於聖日雖圖澄入夏
祇辭于闐之東羅什依秦亦自龜茲之北校其迢遞亦
驗專勤緬維臣子之心允自聖明之感永編國史克廣
聖功臣獲奉天光不任

云云

壽春節進元始天尊幘并功德疏表

臣某伏以九曲澄瀾二儀交泰星渚表流虹之應斗樞
開飛電之祥瑞叶千年歡周萬國伏惟陛下握符受命
端宸承天弘至道而繼三皇敷上德而超五帝化覃海
嶽恩普華夷鑿齒雕題常修職貢四荒八極畢贄琛珍
平六府而天降殊祥洞三泉而地呈嘉貺莫不書披玉
篆波躍金鱗獸顯霜姿禽飄雪翅芝英菌蠢膏露歲蕤
靈仙時見於烟巖貞檜重榮於雲谷瓊儲歲稔寶貨川
臻無向隅不獲之夫有比屋可封之俗故得遐方慕聖

異域歸庭鼓舞翹誠歡呼率化桑乾瀚海僧法靜則稽
首朝天身毒屬賓三滿多則傾心入貢皆瞻北極共祝
南山今屬日麗九芒風和八景壽春大節誕聖昌辰輒
繪真容願崇睿福臣某集當院道衆起今月一日開置
靈寶延壽道場七晝夜香燈燭潔焚誦精虔冀憑妙道
之功永祝無疆之壽前件畫像及功德疏一通謹輒陳
進干冒宸聰無任云云

謝恩賜陽平山呂延昌紫衣表

臣某伏奉勅恩賜陽平山主呂延昌紫衣仍補充內殿
焚修大德者恩垂霄漢榮及巖林草木增輝烟霞動彩
凡茲簪褐共感休明臣某中謝伏惟皇帝陛下惟睿開
圖握符御宇仁覃九土咸叨怙冒之恩政布八荒已洽
雍熙之化由是羣方述職重譯賓庭屬祝聖之昌辰標
壽春之大節布鴻私於二教灑皇澤於萬區呂延昌久
處烟蘿深精藥餌方專心於葺理敢企望於寵榮豈謂
陛下切念勲臣獎深學術以延昌醫方著效致彥謹

危疾蠲除迥降隆恩顯頒命服霓裳象簡難勝天地之
私暮燭朝香誓答聖明之照臣某與道衆等不任 云云

廣成集卷二

欽定四庫全書

廣成集卷三

後蜀 杜光庭 撰

宣進天竺僧二十韻詩表

臣某伏覩西天三滿多到闕朝對者伏以北通玉塞西
渡金河路出重關程逾萬里班定遠之經歷才及烏孫
張博望之訪尋祇過青海或蛇州魅磧人跡莫窮或飛
靈流沙馬蹄難至由是聲教或異職貢少修崑嶠白環

首標瑞典鐘山火玉顯謂祥珍况身毒居憑嶺之陰于
闐隔雪峰之外天竺遼覓跋涉辛勤慕中華億兆之尊
嚮大蜀聖明之主壽申朝覲實美簡編伏惟陛下縱聖
體乾膺圖啓運德逾羲頊仁冠堯湯修文德而御要荒
耀武功而安寰海故得西夷率服萬寓知歸南通交趾
之鄉北聚穹廬之俗獻琛奉贄無曠歲時竊惟聽政之餘
每降自天之澤興弘玄釋歡獎崇修梵刹嚴精道宮煥
麗一心齊致二教俱榮紫霞洞之仙客効祥天竺國之

胡僧入貢咸歸睿感共福皇圖率土臣寮同深抃蹈臣
某芝田末學蓬岫孤蹤獲奉天慈俯宣明命謹課頌聖
德七言詩二十韻一首陳進昨自三月己未偶縈疾苦
不獲隨例舞蹈堯階無任歡呼屏營之至

謝手詔表

臣某言今日伏奉恩旨以臣今月十一日上表稱賀聖
體痊復事賜手詔獎飭者絳闕流恩紫泥頒寵仰承天
造俯慰凡庸臣某誠榮誠恐頓首頓首竊以臣叨將踈

野幸列班行雖焚修每念祝於龍圖而旦夕合趨於鳳
闕洎嬰疾苦稍曠朝天昨日以皇帝陛下庶政懷勞萬
幾關念偶致違豫尋就痊和是以臣稽首歡呼飛章稱
賀實簪裳之素分乃周列之常儀豈謂皇慈曲頒

闕

臣某言伏奉恩勅以臣今月二日上賀登極表一道賜批
答獎飭者寵降丹霄榮臨玄教綸垂五色出仙禁以昭彰
日煥九芒向芝田而照燭驚榮失次扑蹈無階臣中謝
伏惟皇帝陛下珠衡誕瑞玉斗縱神出震域以重光為

乾樞而纂聖德超啓誦弘孝德以垂衣明繼勛華宣大明而御宇湛恩遐布惠渥旁敷歡呼振野以成雷嘉氣凝空而作葢華夷億兆就日瞻雲臣某限以衰遲兼嬰疾恙仰龍墀而結懇陪獸舞以無因遂貢封章遙陳誠悃豈謂特隆睿獎俯降天章成行之瑞露歲筵聯幅之卿雲芬郁捧對而嵩衡未重感恩而渤海非深鷓鴣至微乾坤難報所賜批答臣謹已焚香跪受訖無任荷聖戴恩之至

慰中祥大祥禫制表

臣某頓首頓首言日月不居大行皇帝奄及期祥伏惟
皇帝陛下攀號痛慕聖情難居上為宗祧下徇億兆俯
全大禮永福華夷臣衰疾縈身不獲隨例起居奉慰無任
殞越屏營之至謹奉表陳慰以聞

慰釋服表

臣某頓首頓首言日月不居大行皇帝崩背如昨奄經
禮制伏惟皇帝陛下攀慕永遠聖情難居四海臣妾服

制終禮瞻天靡及履地無容臣伏限衰疾所縈不獲趨
詣闕庭哀慟臣無任感咽推慕之至謹奉表陳慰以聞
慰冊廟號表

臣某言今月某日追冊大行皇帝尊謚及廟號者伏惟
大行皇帝應天誕睿乘運開圖豐沛振衣功超於漢祖
邠岐杖箠仁邁於周文考唐堯翊善之名遵虞舜盛明
之號今則式崇尊謚爰美聖功億兆咸哀寰區共感伏
惟陛下悲纏罔極孝理萬方仰弓劍以難追奉冊書而

增感普天率土哀殞同深

慰啓攢表

臣某言伏承大行皇帝今月某日啓攢官者哀纏百辟
號慟六宮伏惟陛下攀慕哀號聖情難處對弓劍而增
感歎光景以冥懷臣伏限衰疾所縈不獲隨例表慟無
任隕越屏營之至

慰祔廟禮畢表

臣某頓首頓首言伏奉某皇帝祔廟禮畢者禮重宗裡

序申昭穆克遵嚴祀永耀神功云云伏惟陛下順考禮
經欽明孝德正春禘秋嘗之典宗配天奉聖之儀允集
鴻休永崇清廟普天率土哀慕同深

慰封陵表

臣某頓首頓首言伏覩大行皇帝陵寢封為某陵者臣
竊惟大行皇帝吞日叶祥履星應夢握乾元而啓歷拓
坤野以開基鄙吳魏之三分廣行恩化欲華夷之一統
將混車書陵寢正名允符聖德伏惟陛下纂承事重追

美為先光顯遺功輝華盛禮仰瞻懿躅稍慰聖情凡在
臣寮同深哀慕

慰發引表

臣某言伏惟大行皇帝靈駕以今月某日發引者二儀
交感兩曜無光億兆咸哀雲霞共慘臣某誠推誠咽頓
首頓首伏惟陛下孝思罔極聖情難居望仙駕以漸遙
聽薤歌而增咽追攀不怠號慕難勝

賀登極後聽政表

臣某言伏審今月九日皇帝御明德殿聽政者文物羽
衣初陳紫詔臣謹已焚香跪受訖無任瞻天荷聖激切
屏營之至

謝宣賜道場錢表

臣某言今日伏奉聖旨以臣自前月二十一日就當院
集在觀道衆老宿等於三清壇上為皇帝陛下開置靈
寶消災轉經禮念道場伏蒙宣賜錢二十貫文省除者
伏以中朝錫寵內庫頒財仰奉天慈倍銘允懇臣其中

謝伏以叨為教主深受國恩凡日焚修皆歸職分豈期
聖造仍降明贊助之期廣天地遐長之壽臣某榮逢聖
日仰覩神功不任

賀聖體漸痊愈表

臣某言伏審昨日已來聖體頓就安愈臣某誠歡誠躍
頓首頓首伏惟皇帝陛下深仁御宇至道垂裳惠匝萬
區恩周品物晝乾夕惕焦勞而腠理愆和肝食宵衣憂
軫而寒暄爽候今則神明幽贊川嶽効靈清廟昭祥玄

穹降福克安聖寢彌增兩曜之輝廣納洪休益永萬年
之壽華夷忭悅億兆歡呼臣某日旬以來目疾未減不獲
趨馳玉闕蹈舞天階瞻望烟霄不任

賀疾愈表

臣某言伏審聖體已就痊平中外臣寮咸增踴躍臣某
誠歡誠忭頓首頓首臣聞五緯經躔尚有差其行度四
時行動猶或爽於慘舒雖寒暑之乖宜益陰陽之常數
伏惟皇帝陛下順時設教以德臨人萬機每繫於宸襟

六氣稍違於聖體今則神靈叶贊宗廟垂祥廣集天休
頓安聖寢足嗣唐堯之一統永延周帝之遐齡頒賞錫
於醫工恩流海內聽歡呼於品物聲震重霄臣某仰
天上之龍顏已增感聖捧禁中之鵝眼更切祝堯其所
賜錢臣已依數跪受俵給道衆訖臣與道衆等無任感
恩激切屏營之至

賀嗣位表

臣某言伏審今日皇嗣寶位光御洪圖率土歡呼普天

欣戴臣中賀臣聞成王嗣位舉千載之徽猷舜帝繼明
為百王之茂典上膺天命下契人情伏惟皇帝陛下道
比成康仁同舜禹德宜符於五緯運潛契於二儀是以
克昌宗祧光升寶位鼎祚彰維新之命洪基顯隆永之
期即使車書混同夷夏清泰九土有歸山之馬四溟無
橫海之鯨克振皇綱永安大業臣叨榮昌運獲列簪裳
仰馳捧日之誠雖同龜卜俯抱卧漳之恨莫遂鳧趨臣
無任瞻天望聖踴躍屏營之至

賀德音表

臣某言今日皇帝御殿宣降德音者臣聞聖德法天應
候每行於亭育神功體道順時克布於生成莫不澤被
九黎惠敷萬國凡居覆載咸動歡呼臣某中賀伏惟皇
帝陛下宅據寰中日臨天下克儉而茅茨不剪栖神而
金鏡高懸是以冒瀆宸嚴無任兢懼戰越之至

賀封資王忠王表

臣某伏覩降制封資王忠王者絲綸顯降典禮昭行宗

社貽休褰區增忭中賀伏惟皇帝陛下仁推立愛道慕
篤新增玉厯於延洪固瑤枝於遠大鳳書錫命麟趾增
華浮喜氣於絳霄集榮光於朱邸臣歡逢聖運仰覩威
儀不任

賀新起天錫殿表

臣某伏覩恩勅大內新殿成賜名天錫殿者鼎新正寢
光錫嘉名中外榮瞻華夷增忭臣中賀伏惟皇帝陛下
承樞啓運握斗垂衣包九土以君臨闡四門而敷睦法

天構宇隆帝宅於上京括地開基壯皇居於億世由是
前羅象闕遐啟龍庭總日月之貞華高嚴秀闥集星辰
之瑞彩廣啓文軒巍峩壓參井之墟岌業應氏房之狀
莫不嶽靈飛礪川后貢材人以子來功資神助雖鎬宮
魯殿彼瑣細以難儔漢闕周堂固尋常而莫並功云告
畢寶額爰新顯神授於上玄以符天錫耀宏圖於八極
永播聖功臨海嶽而閱琛珍會諸侯而朝萬國將陳大
禮以福羣方雁塞穹荒雲奔玉帛雞林絕域霧集梯航

運在無為俗欣有道今則普宣德教克順正陽安地表
之遺黎高開壽域御天錫之新殿更扇薰風慰征役於
藩方免逋懸於郡縣魅鄉遷客俱從釋宥之恩囹圄縲
囚盡舉寬明之典式因三赦將俟一同臣伏恨疾瘵所
縈不獲隨例蹈舞玉階無任歡呼踴躍屏營之至

又賀德音表

臣某言今日皇帝御殿宣降德音者雷雨作解渥澤滂
流被九土以無遺致羣生之咸泰華夷億兆孰不歡呼

臣某中謝伏惟皇帝陛下嗣聖繼明握圖御宇蒸蒸大
孝同漢惠以承桃翼翼小心比周王之纂極文懷遠俗
武戢遐荒膺乾而化洽無垠出震而仁周有截今則凝
旒御宇正殿宣恩安地表之黎元高躋壽域灑中天之
德澤更扇薰風憫征戍之勤勞釋賦租之逋滯投荒遷
旅囹圄縲囚俱從赦宥之私盡舉寬明之典騰歡聲於
域外浮喜氣於雲間車軌書文佇歸一統瑤圖玉歷克
保千春臣獲以衰遲躬逢睿聖方嬰疾疹不獲蹈舞堯

階瞻戀天慈無任歡呼踴躍屏營之至

謝批答表

臣某言今日皇帝御殿宣賜批答竊惟佩玉鳴鸞欣登
於玉砌行鵷振鷺乍列於瑤墀中外同歡寰瀛共賀臣
某誠歡誠躍頓首頓首伏惟皇帝陛下九天誕聖七政
縱神執玉斗而御乾龍將寧四海握璿衡而司大象爰
牧萬方敷啓后之文明懋成王之道德今則雲開碧落
齊瞻北極之尊霞散滄溟共奉大明之照恩覃有截惠

洽無垠臣跡滯芝田榮逢寶運悲越吟而自感趨漢闕
以無由瞻望堯天不任踴躍歡呼激切屏營之至


慰山陵畢表

臣某言伏承大行皇帝山陵禮畢者神宮長閉仙寢永
安率土生靈不任號慕云云伏惟皇帝陛下追慕不息
聖情難居對馬鬣以增悲攀龍髯而永隔遊衣尚在仙
駕已遙追想英威推慕何及臣某伏限衰疾不獲奉慰
闕庭不任號殞推咽之至謹奉表以聞

請不赴山陵表

臣某言竊承山陵俯逼皇帝陛下哀慕無窮欲躬赴陵
寢者恭聞中旨實駭人情凡被照臨莫不惶惑臣某誠
惶誠恐頓首頓首伏以帝王之孝也法天順人緣理制
禮俾生靈咸若而宗廟永安未聞以弓劍之哀誠履魯
閔之獨行遽勞警蹕親奉告修伏惟皇帝陛下考百王
之舊儀徇歷世之成典特回聖鑒俯契禮文遵前古之
通規示後王之令範彌彰孝理以慰萬方臣不任瀝懇

虔望迫切之至謹奉表以聞



廣成集卷三

欽定四庫全書

集部
廣成集卷
六
四至

詳校官國子監司業臣納麟寶

檢討臣何思鈞覆勘

總校官庶吉士臣何思鈞

校對官中書臣嵇承志

謄錄監生臣劉文燿

欽定四庫全書

廣成集卷四

後蜀 杜光庭 撰

戶部張相公修遷拔明真齋詞

臣聞太上開圖元皇演教三錄定金明之典功被人天
九幽懸玉匱之科惠周存沒竊惟經旨遵按玄文仰祈
遷拔之恩輒備懺陳之懇今月二十五日是臣先妣唐
楚國夫人蜀追封宋國太夫人劉氏忌辰今月三十日

是臣先考唐丞相太子太師致仕蜀追贈太尉忌辰謹
賚油燭香花供養之具於成都府玉局化北帝院奉修
靈寶明真道場一晝一夜道士一十四人三時行道三
時轉經對乾象以披心馳香龍而上奏伏惟高尊憫鑒
衆聖垂光普告四司關明三界降九龍符命開長夜寒
庭鍊沐形魂遷拔神爽出玄陰之府入洞陽之宮罪咎
蠲消冤讐解釋落名地簡列籍道階輪轉福鄉克登仙
品九玄幽識咸遂超昇誓勤修奉之心上答真靈之澤

張民國太夫人就宅修黃錄齋詞

伏以妙道玄功濟時佐國真經秘旨拯物救人肇宏規
於億劫之前弘大化於萬天之內宗之者儲祥納祐修
之者駕景登辰披究古今昭彰典誥張民國克承禎貺
運遇聖明被沐天光輝華帝澤循懷顧分常抱兢憂省
已修躬每為炯戒實恐往世之積瑕未懺此生之累釁
將深幽陰有註訟之書冥漠有考延之籍又張氏今年
天符臨於木墓之位暗曜住於飛化之年火星照於身

宮仍當尅之性分大運逢王金之上火力稍微小運值
生金之鄉木氣已薄緬思危命倍用憂虞竊惟大道無
方施恩普合式申虔祝必介休祥是用蠲潔丹心修崇
黃籙像瑤壇而肅列按瓊韞以敷陳質信諸天燭蘭缸
於午夜告明三界飄檀蕙於九時露懽馳誠希恩悔過
伏惟高尊太上萬聖千真憫鑒叩祈昭宣渥澤勅天司
地府命陰職陽寮黑簿落名青宮著籙和平債訟消釋
冤仇北都除執對之篇年齡漸遠南極定延長之紀祿

祚尤宜五行祛災滯之文九曜息照臨之咎常歡舜日
永廕堯天眷屬樂康子孫忠孝九玄七祖往逝先亾或
拘滯昏衢未超福路願承道力便遂往生利祐見存允
蒙貞吉其有三塗六趣夜府寒鄉亦因懺滌之緣盡獲
逍遙之果陰陽將吏宅宇龍神長悅豫以安寧俾凶衰
而殄息上願皇圖遐廣聖壽延洪卜年克大於姬周享
祚更隆於炎漢寰瀛一統書軌混同共傾捧日之心咸
沐自天之祐

奉化宗祐侍中黃錄齋詞

伏聞道本無為降元精而生二象象而後數羅五緯而
備羣形維地麗天無違於律歷陽舒陰慘咸繫於裁成
由是善惡循環吉凶倚伏乾剛坤載不能排九六之期
蟾魄烏輪不能革盈虧之勢况乎二儀稟質三命定生
未超變化之機固有推遷之理是宜兢懷省已審過知
非常加策勵之心冀動真靈之鑒臣夙承玄廕早沐洪
休運遇睿明身叨寵任推忠陳力未申匡濟之勞翊聖

扶天累荷超逾之渥將壇相印委遇益隆蒼珮行師徽
榮彌厚戒滿盈而徒切報君父以何階尚恐動靜行藏
有乖於素分屬心舉念有忤於神明或在公有失於賞
刑統衆有愆於裁斷或往世之尤違未解或積生之寃
債未祛有一於斯皆宜懺滌又今年二運俱逢於墓位
飛天仍值於火星雖居華蓋祿德之方恐有刑尅照臨
之數以茲兢懼倍切懇誠徐氏年運之中亦有災滯大
小二運金火氣微飛宮遇於計都天符臨於生月恐為

災滯志在懺祈是敢恭備信儀虔申齋潔按立都品格
修黃籙道場嚴香花於二日六時召真聖於諸天諸地
凝神屏慮仰副真靈

趙部助上元黃籙齋詞三首

至道流慈元皇垂貺三宮四赦爰孚作解之恩品物昭
榮共樂如春之澤皇壇巨祐幽顯無遺臣以庸愚叨逢
聖運早承寵祿常戒滿盈猶恐年厯之間星辰之內因
纏厄會尤切兢憂輒因黃籙道場虔申悔謝仰希上聖

俯鑒冲襟密賜福祥潛祛災咎壽年增益家眷康宜存
歿幽明同臻景祐

中元

律移朱夏節應素秋鼓夷則於西郊歛火雲於南極裁
非戒惡允屬茲辰猥以塵土叨親道化身叅丹錄名隸
玄臺而過尤易結世罔難祛動靜行藏未混融於大道
年辰宿曜猶纏集於衆災輒因黃錄寶壇助營香供冀
蒙聖力垂鑒愚衷開罪書而解救愆尤豁塵累而蕩蠲

厄難九玄受賜舉族霑榮永承祐護之恩誓竭歸依之願

下元

臣以宿因獲承積祐早忝職務族泰官榮而所主重難常深憂懼尚慮年行災滯星曜加臨遂履困蒙莫知祈告今屬玄冥屆節水帝司辰斗杓方指於孟冬朔氣正雄於北陸年光遷貿修奉彌專敢因九奏之注念瀝懇披心伏惟萬聖迴光衆真流鑒憫其丹款錫以休祥赦已

住之罪瑕息將來之厄滯明星暗曜無臨照之凶三命
五行除衝妨之會冤仇和釋債訟消平嗣胤繁昌壽祿
延益九玄蒙福幽夜開光眷屬康寧龍神安豫上願聖
躬萬壽大業永昌布聲教於九圍咸歡舜澤混車書於
八極共樂堯仁百穀豐盈六氣均暢誓傾忠孝上酬英
睿之慈克勵精誠仰副真靈之祐

上官子榮黃籙齋詞

伏以大道玄功至真妙感隨方流貺應念垂慈佐國濟

人恩周於動植祛災降福惠及於幽明凡所啟祈必蒙
昭鑒某氏以今年大小運行之內恐三命衰微陰陽宿
曜之中恐五星臨照致成災厄無所告祈竊聞黃籙妙
齋功德廣大無災不解無厄不禳輒罄丹誠冀蒙玄祐
謹依科法開置壇場三日香燭九時懺謝至真冥應有感
必通伏願三境諸天高真衆聖降無涯之澤垂廣覆之
恩為某氏解除積世罪瑕多生寃債隨懺消平應時除
蕩眷屬安貞公私和泰誓傾忠孝永奉聖明

飛龍唐裔僕射受正一錄詞

伏聞冥寂之初混元之首道生一氣分彼兩儀陰陽有
昇降之殊清濁有仙凡之異是以紫青金闕高居太妙
之庭黃軸風關下鎮窮泉之域隨機染惑因生進退之
疑委跡沈浮遂有飄搖之痛既非先覺必在指迷玄元皇
帝當東漢之季年啟南宮之寶笈首傳真錄大拯羣生
修之則駕景冲虛行之則濟人佐國或蕩平氛沴或懲
革兇妖正日月之天元風雲叶候靜災邪於地紀生植無

愆歷代所尊垂休靡極臣夙承道廕獲奉皇慈功輕而
渥澤愈隆力薄而君親未報常思稟規秘錄宗受靈文
勤旦夕之香燈勵精虔而祝禱所冀家國同納福祥今
則嚴備信儀恭開壇墀通宵懺滌稽首歸依蘭燈夜燭
於九冥檀炷晨飛於三境恭馳懇款冀達尊靈伏惟太
上三尊玄元大帝十方衆聖三洞威神鑒丹懇之誠賜
感通之應靈官真氣咸賜授傳使內保身安外祛災沴
名臻道籍罪滅陰曹九玄離積夜之鄉永栖長樂舉族

享無涯之善常奉休明算壽遐延公私清泰上願龍圖
攸允鳳歷延洪增聖壽於無疆乾坤共永布皇恩於有
截海岳咸安同為至道之風共暢無為之化

皇太子青城山修齋詞

臣聞靈寶陳規齋戒感希夷之兆真文設教行藏通修
鍊之功莫不啟之於心弘之於道上可以虔祈穹昊昭
達玄微次可以宣布情誠祇延福祐永言清信敢薦虔
恭伏以皇帝劃地開基法天垂覆定禍亂而爰承上德

闡真明而克應金行翼翼小心弘朽索薄冰之懼乾乾
夕惕有櫛風沐雨之勞備歷歲時益勤祇敬是致年豐
歲稔國富兵強定蜀漢之疆圻扼黔巫之襟帶允文允
武咸序彝倫至公至平式崇治本四方慕義萬里歸仁
梯航無隔於高深書軌盡同於風教蓋九霄之靈應信
大道之冥扶是使帝圖聿昌宸算永言戴仰彌切兢持
近者以星象留行稍淹時景分野觀矚寔資禱祈是用
潔志清心忘機滌慮召十洲之法侶約三洞之玄科敬

設清齋仍修大醮伏願上真降鑒衆聖宣慈迴機軸於
玄關啟輝光於丹道凡言災沴並獲除消但有吉祥皆
承感應增聖壽於千秋之外播皇猷於萬宇之中壽山
更峻於五山福海更深於八海與乾坤而齊固共日月
而合明叶華戎推奉之情遂臣子依憑之懇盡繫至教
俯契微衷冒瀆真仙無任兢惶戒懼激切屏營之至謹
遣得一大師賜紫張茂卿等一十四人虔修法事願鑒
丹誠

普康諸公主為皇帝修金錄齋詞

伏惟道混虛無泮玄黃為九玄之始象凝恍惚標化育
為獨化之源於是覆載以乾坤照臨以日月三才並道
剛柔之用迭興品彙攸生善惡之端遂列然後降之以
君父佐之以股肱法高皇不宰之慈體大帝無言之照
弘安疆域大庇黎甦伏惟皇帝陛下出震臨人承乾御
歷稟樞機之精耀含嶽瀆之靈源明契三辰運符四序
當天人之允屬表識瑞之咸臻因念陵夷遂康蒸庶鎮

寧郡國割裂江山辛勤侔大禹之功化洽媿周成之德
豈忘宵旰莫憚焦勞是用和平永期清泰某等今以時
當端月節遇正陽屬二氣之將交處午位之炎景思弘
百福用薦千齡啟金籙之靈壇造玉京之勝地伏願皇
帝明齊月桂壽比天榆握金鏡以御寰瀛致衢樽而歡
億兆垂旒問道覩元凱之忠貞負宸調元獲夔龍而翊
贊四三皇而永固一六合以無虞仰奉虛皇俯垂玄造
冀納虔誠之志獲申懇禱之誠

皇太子為皇帝修金錄齋詞

伏以浩邈無涯育乾坤者至道彌綸莫極運造化者玄
功凝一氣以生三才周六虛而吹萬有所以春皇秋帝
雲紀火官承妙用以御寰瀛體無為而統天地曷常不
含和韞粹端拱穆清執大象以臨人乘飛龍而布化雖
流金鑠石湯德彌光懷山襄陵堯風益扇皇帝應圖負
宸握鏡開基慕玄元慈儉之宗仰黃帝華胥之躅日慎
一日雖休勿休故得聲教旁敷京坻積稔俗臻暇豫民

樂雍熙交歡自洽於隣封琛贐爭來於絕域倍增寅畏
祇荷穹旻昨以垂象飛芒天文炯戒躔度雖殊於分野
禱祈勵切於焚修恭啓皇壇敢希鴻福仰玉清之玄化
稽首知歸開金籙之道場齋心發願所貴者達誠碧落
薦壽皇躬與日與月之同明共地共天之咸久青詞奏
御俾金莢以韜光丹衷通真致珠囊之叶度災纏永息
禎瑞常臻鳳歷克調狼烟不警政除三五祚起億千位
忝儲宮實欽仙境輒傾素懇仰望玄慈

金史紀事本末卷四
中元衆修金錄齋詞

伏聞至道希夷真精玄寂弘化於混元之表凝光於太極之先散淳一之根潛分步驟鼓生三之氣以制寰瀛所以乘龍襲氣之君畫卦垂衣之后順敷道要創厥皇基恢妙用而福寰區布神功而利天下昭彰帝紀炳蔚人文允屬睿朝誕應天眷皇帝儀乾受命應運開圖繼軒黃帝頊之靈源茂亶父周公之至德纂承玉錄光啓金衡端旒宸以穆清慕唐虞而真正思洽大同之理以

康九土之民稼穡連豐華戎咸泰皇儲輝重明之美遐
方贊有道之風中外恬夷生靈輯睦况屬三元令序大
宥昌辰宜虔齋潔之誠共祝君親之壽拂瑤壇而展禮
按金錄以陳儀龍綵質心香花備信焰九光之蓮炬下
照冥津飄三素之檀烟上開真域必冀三天降祐萬聖
延慈宗社隆昌寶圖安鎮齊乾坤於聖壽等日月於睿
明文德武功綏寧八極天枝寶盾輝映萬齡儲皇享椿
桂之年常扶大業妃后潔蘋蘩之德並翼宸居朱邸清

廟彌臻景貺外藩內輔益履殊榮常樂雍熙皆登富壽
其有宿殃積孽往債前寬年辰命運之災奠紀飛旗之
厄乘茲懺謝並乞消平即冀宗廟尊靈生神三境臣等
九玄七祖受福諸天貽祚流祥傳休無極上願天文昭
著緯象澄清回直符太乙之旗息玉彗金芒之曜蕩憂
患於井參之野延福祥於梁益之墟九穀無虞五兵斯
戢螟蝗水旱無肆沴於農功疫癘凶荒靡非災於閭里
幽關舒泰品類滋榮海岳歸仁寰區稟化至有立功將

士往逝都頭勳著勤王忠推効命每因齋薦皆為懺祈
必離冥漠之鄉更遂逍遙之樂或幽陰尚滯渙澤未霑
或嗣續已無莫羞多闕九宮符命即為遷神二錄洪恩
俱令濟苦勿為疵癘速詣福庭動植飛沈盡登真道

皇帝修符瑞報恩齋詞

蓋聞歷代帝皇受天符命咸宗至道以御鴻圖莫不用
慈寶以臨人仗玄功而濟物克致雍熙之運仍頒祥瑞
之文顧以薄躬猥臨大寶寰區尚擾思偃武而未臻法

令頒行念措刑而莫得內惟兢業莫敢違寧今年七月
漢洲十郡縣百姓郭迴芝於仙居觀採藥耕地掘得銅
牌長七寸廣四寸有六十字老子通天記云丁卯年甲戌
乙亥人王生享二百年天子王從建王元膺王萬感王嶽
王則王道宜五字篆文後云北邙化張弘道天寶留此
明聖代欽承玄貺虔佩靈符識天道之垂休知百年之
惟永爰傾丹懇用答殊休按九等之科儀修靈寶之法
事所願丹心徑達聖鑒俯臨社稷永昌休徽必應四時

合序萬物以嘉俾令率土之賓盡保無疆之福稽首謹詞
黃齋助中元黃錄齋詞

伏聞三元大宵乃諸天降福之辰九夜長幽是厚地重
陰之境將消積暗爰假神燈上納三光下照群異經科
所重濟獲攸先今屬序屆中元壇開黃錄三時朝懺萬
罪蠲消輒備香油同申供養伏冀鸞輝鳳焰凝光地府
之中星布蓮敷散景泉扃之內盡超苦趣永出冥津九
祖生天六親介福災祛未兆善洽無疆奉上安家並希

元吉

黃齊為二亡男助黃錄齋詞

臣聞包容萬象大道為亨育之尊弘濟羣生天尊演虛
無之教莫不思覃纖芥澤普存亡明真開玉匱之書長
夜釋重陰之苦丹誠上感玄貺必臻臣過咎夙彰神明
垂譴纔逾一月繼喪二男憔悴中年寂寥孤影痛蒸嘗
之時絕念冥漠以何依懼被營魂尚為拘滯伏思遷拔
唯仗焚修捨其服用之資助此香燈之會不任虔祈之至

馮涓大夫助上元齋詞

伏以大道垂文澤周存歿天尊演化恩及幽明廣敷九
等之科以拯重冥之苦敢持哀懇仰叩玄闕今月二十
六日亡妣隴西郡君贈隴西郡太夫人李氏忌齋詣玉
局靈壇因上元勝會同修香供用禱福祥伏願亡妣鍊
景朱陵棲神玄圃悟恬澹希夷之道契長生永劫之真
玄會無為克臻妙果

中元

伏聞黃籙明科紫陽具典玄元勝力丹簡宣恩拯拔幽
沉照臨冥夜古今宗稟生死銜恩有感必通所祈克應
今月二十六日是臣先妣贈隴西郡太夫人忌辰輒因
玉局壇場中元齋薦同申修奉冀達真靈伏願亡妣乘
此福緣高昇道境遊神碧落悅影丹臺永登快樂之鄉
克證希夷之道

下元

伏以黑帝御時玄冥肇序下元勝會大有昌辰所宜虔

祝上真勵精下土用祈禎貺以福存亡今以玉局靈墟
瑤壇展禮輒持法信用助齋誠敢希衆聖鑒臨萬真昭
祐九玄開度超離冥漠之鄉五族叶和長荷安貞之福
災凶殄息罪咎消平永誓丹襟仰承洪澤

周庠員外助上元齋詞

伏聞齋敷九等節啓三元是萬方禱福之辰是衆聖宣
恩之日今屬玄元真化玉局靈壇陳黃籙之儀按玄都
之品九時奏御三日焚修精助香燈同申蠶滌伏冀高

尊垂祐大道流慈採納精誠降頒鴻福九祖遂超昇之
願六親霑覆護之仁消厄滯於將來解冤仇於既往罪
咎原釋疾苦痊平壽祿增延凶災除蕩克叶發生之德
敢忘大道之恩

下元

伏以玄帝司辰水官統序乃請福延恩之節是凝心滌
慮之期况玉局仙縱瑤壇盛禮九時焚祝必介於休禎
三日齋莊敢同於懺謝所冀災纏殄息冤債消平罪咎

咸蠲存亡共泰永虔修奉以答玄慈

盧蔚大夫助上元齋詞

伏以大道周行三元立訓陟明考校毫末無遺臣早慕
玄虛夙宗清淨每展恪勤之懇以祈昭祐之慈今以玉
局靈壇上元福會輒賫香燭同助焚修所祈消解災凶
滌除罪咎蠲平疾厄延益年齡善功克被於存亡禎貺
榮周於眷屬永勤丹懃仰副玄慈

上元

伏以考校良辰先春令序當上元陟明之節乃羣生舒
泰之期式罄齋誠以申虔祝今屬錦都靈化玉局瑤壇
啓黃籙之真儀展玄科之盛禮輒持香信同助良因伏
惟衆聖垂慈萬真昭鑒憫其修奉錫以禎祥惠普存亡
遐祛罪咎解災纏於未兆增祿壽於惟新永勵丹心上
副玄貺

中元

伏以四始周行三元定錄陟明顯晦考校無遺臣素奉

道科早師玄寂每逢良會必勵修崇今以玉局朝元霜
壇歲事輒賚香燭潔助齋功所祈大宥之恩允降自天
之澤疾恙痊愈祿算增延仰薦先靈旁沾眷屬永承丕
祐欽贊元勛不任歸命丹切之至

下元

伏以水德配時玄冬叶候當二氣謹藏之節是諸天校
會之期所宜勵志重玄疑心至道滌瑕悔過請福希息
况玉局皇壇錦城福會敢營香幣因助齋修三日肅虔

九時朝懺奠蒙祐廣賜休祥賜臣玄祖超昇陰冥開
泰存亡濟度災咎消平釋寃債於夜庭落罪尤於地簡
疾厄痊復算紀遐長誓傾嚴奉之誠常副真靈之祐

廣成集卷四

欽定四庫全書

廣成集卷五

後蜀 杜光庭 撰

上元玉局化衆修黃籙齋詞

伏聞道出虛無之表職在生成德超仁義之先功包慈
育化綿億劫教普羣方由是三皇以道御乾坤五帝以
德承天地人臻福壽俗致雍熙雖金木運遷步驟時革
理家康國惟道為先行之則四海晏清代遷淳樸達之

則中原板蕩物變澆漓我國家師太古之風紹玄元之
訓懷道抱德祖堯述舜故能縱神武以滌埃氛中興鳳
歷光聖文而安社稷克固鴻圖臣等夙荷道慈獲逢昭
運微功未著寵以深恩俯盡齋潔之誠仰報君親之德今
屬天官統序木帝司方當上元校戒之期是下土精修
之節共賚法信同詣靈壇備玉籩金豆之儀陳十極四
華之禮蓮缸散焰續陽景以燭幽關蘭炷飄烟御星纏
而達卑懇必冀衆真迂駕萬聖迴軒俯鑒羣心洪流巨

福上扶宸極安帝業以天長仰奉廟謀鎮坤維而地久
邊烽不警氣序式和穀稼滋豐生靈舒泰寰瀛輯睦車
軌混同妖沴不興禎祥薦委臣等存亡介福七祖生天
族屬沾榮三災彌息或前生今世罪網未祛或往債宿
冤過尤未解或刑章有失或宰割不明或故殺誤傷因
成報對或運心履行有犯神明或土木奢華服用繁侈
三官紀過五帝司非憑此懺祈皆希洗蕩臣等壽齡延
永祿祚遐長災厄蠲消冤仇和釋其有同心事主戮力

勤王風露先驚古今俄隔緬惟夜府願享福緣大伸濟拔
之因俱遂超昇之路其次蒸嘗曠絕冥漠無依亦俾往
生勿為淪滯龍神正秩五廟靈司乘黃錄之殊恩沐玄
都之景貺肅清風景安鎮方隅疫毒無侵干戈不作蛸
翹異品動植殊形六趣四生三途五苦九龍符命三寶
威光普沐神功並登真道

白可球明真齋讚老君詞

伏聞道本至無化分妙有功包覆燾恩普幽明家國稟

之以安寧存亡得之以開濟神威靈澤妙用無窮臣以
玉局洞天神仙與府將申瞻敬式表宸儀遂為玄祖幽
扃塑造真像眸容端穆侍衛駢羅疑珠宮下降之初若
玉座浮空之際巨功既畢妙相益嚴日角月玄煥矣羣
生之主綠眉皓髮巍乎萬聖之尊永福一方以鎮靈化
是用虔修表讚載展誠祈披玉匱之科備明真之典轉
經行道燃燈炷香瀝懇上玄冥心下土伏冀傾光三境
廻駕九清憫鑒塵微降流禎貺潛扶寶祚密祐聖朝契

自然清淨之風臻太古無為之理次願坤維肅穆川境
晏安符瑞有聞災凶不作臣九玄幽爽七祖魂神出長
夜之庭昇洞陽之館毀絕地籙起翕天衢洎乎有識含
生三途六趣俱沾景福各遂生成臣積罪銷平宿瑕除
蕩災纏霧廓道化風行得罔象之玄珠入希夷之秘籙
誓精脩奉以答玄恩

溫江縣招賢觀衆齋詞

伏聞妙道融真高出混元之表天尊立教光敷浩劫之

先歷代化人隨機濟物大惟邦國普及幽明俱賴神功
咸承景貺臣等叨逢聖運夙稟真詮欽玄元道德之宗
覩烈祖先天之躅尚拘世網未脫樊籠分地用天恭
守玄儒之訓節財約已敢忘覆載之私今屬至聖垂衣
元勳拯俗五兵罷警百穀薦登野洽謳謠人歸富壽當
天井降生之月是三台誕瑞之期將報洪恩莫先黃籙
是敢博求衆力同備信儀嚴飾仙縱遵依秘格披心十
極歸命諸天燃燈炷香馳誠達懇伏冀三尊駐景下察

丹襟萬聖迴軒傍流玄澤上扶社稷配天地以安禎仰
贊聖躬同日月而輝煥台星福曜常鎮坤維將畧廟謀
永宣井邑一方昭泰四境久安疫毒無侵戈鋌不作臣
等九玄七祖超度泉扃五族六親允蒙禎祐銷平罪咎
和釋災凶農桑克保於豐穰幽苦咸期於扶濟龍神鎮
守風雨均調道化周行靈威廣被茫茫九土擾擾四生
承黃壇普懺之緣因太上九龍之命俱昇道果普陟仙
階飄浮絕祭之魂霜露沾零之魄勿為疢癘各遂往生

道力所覃永叶元吉

犀浦劉殷費順黃錄齋詞

伏以清淨之宗託重玄而設教生成之本資妙用以宣
功家國稟之而允昌古今運之而不竭粵惟道化首帝
先今屬睿聖御天元臺分閩敷弘道德字育蒸黎法伊
堯媯舜之仁邁后稷臯陶之德萬方有泰四境無虞共
感殊恩何階上答是用率勉寮屬考授經科嚴飭壇場
備申齋潔精香燈而達懇奉信幣以表誠注念九清馳

心三境伏奠玄光下燭至聖冥通俯鑒羣情滂流巨澤
上扶帝業光讚聖朝比三辰以並明婉兩儀而等固鯤
池鳳穴之野聲教遐傳桑律蒙谷之卿車書混一保寧
藩部匡祐元戎天祿永增壽涯彌廣臣九冥玄祖超苦
趣於幽關五族周親享善緣於道域封隅之內三農有
積於倉箱政化之中羣瑞日編於簡冊干戈靜息痍癘
無侵其有滯骨飄魂久悲風露傷墳敗廟常苦凋荒乘
此勝因咸臻妙樂龍神安鎮士庶昭甦蠢動有生同昇

福界

飛龍使唐裔為皇太子降誕修齋詞

臣聞惟道為大運玄功而生育乾坤惟帝為尊握洪樞
而主張造化廣司萬國遐統羣生承景命於三清定宏
基於九土由是瑤圖積瑞銀漢騰華載誕元良恢弘大
業今屬祥虹泛綵寶電飛光當重離啓耀之期是率土
虔誠之節敢披雲笈恭詣仙壇脩靈寶之道場儼長生
之勝會鯨鐘鳳磬飄逸響於九天鶴焰龍烟達精誠於

三境伏冀皇圖隆永均雨露以無窮聖壽高崇與八溟
而比大六宮內職協讚宸居萬彙群方昭宣睿德皇太
子龍文鳳質嶽固松貞超漢盈周賢扶一統大同均化
旁及黔黎共宗有道之期並洽無為之運臣某不任禱
祝虔期歸命之至

興州王承休特進為母修黃錄齋詞

臣聞上聖垂科天真設教神功救物無遺動植之中惠
力宣恩普及昇沉之內粵自玄右逮於茲辰荷澤蒙慈

莫知紀極由是鄴山北部替祛邪沴之塵斗極南昌廣
布生成之照必資虔潔方獲感通臣猥以凡微叨榮道
廢遭逢睿獎踐歷官常入侍天階高陟九霄之上出持
符竹寵行千里之中或齊肅師徒頒行刑憲輯寧封部
須舉威章慮垂折中之宜自掇過尤之目以茲兢灼常
寘於懷今則臣母竇氏本命甲子某月日生災運所纏
遽嬰疾苦雖勤服餌未獲痊平恐是往債宿寃尚為注
訟前生今世旋結罪名或星曜所臨或年辰所歷凶災

纏繞命祿哀微曉夕憂惶因知救護臣況主持王事迨
遞道途不得躬奉庭闈親調藥膳心馳萬壑目斷千山
惟憑大道之慈冀集感通之効是用歸依靈觀稽首華
壇修黃錄道場告玄真上聖願迴聖鑒俯介福祥賜臣
母氏易短促之齡益遐長之祚蠲消厄會蕩滌災哀使
六氣均調百關康愈咎瑕除解寃債和平克瞻日月之
華別降生成之福三途幽夜六趣殊倫同享勝因共臻
善貺九玄開度五族安寧微臣常奉二親得勵旨甘之

願榮朝聖主永勤忠赤之誠惟誓丹襟上副玄祐不任
涯懇望恩虔祈之至謹詞

胡常侍修黃錄齋詞

臣聞妙本希微至真虛寂運神功而化育陶品物以生
成應感無私周流靡倦所以九玄三古咸宣燾載之慈
天上人間共沐涵濡之澤金科玉律雲篆瑤章先萬法
以垂文具九流而拯世大哉至教無得而稱臣夙荷道
恩欣逢景運優遊玄造沐浴皇風逸預順於天和俯仰

榮於大化早忝秘錄常勵明誠燧燭焚香每肅虔於曉
夕瓊儀寶韞敢有怠於敬恭族屬周親常臻蔭護是用
精修黃錄上奉玄休按十華三境之儀脩羽磬霜鐘之
禮歸心萬聖稽首諸天伏惟俯鑒丹襟曲垂玄造憫茲
誠款錫以休祥賜臣九祖七玄生天證道六親五族受
福沾榮存亡均康濟之仁動靜獲安貞之賜災凶殄息
寃債和平罪咎蠲銷祿算延益普天含識率土懷生俱
承道德之緣永樂雍熙之化不任歸命虔祈之至謹詞

李玄傲為亡女修齋詞

臣粵自塵微早依真教叨深玄渥夙荷靈休迫以俗機
縈纏世網久拘職宦因遂初心思羽褐以未期欲奮飛
而徒切依栖修敬自怠私誠過咎所鍾女子殞逝光陰
過往傷痛難勝但女子初笄之年歸於儀氏夫歿之後
誓志道門已造製法衣繕寫經錄永期頂冠佩服虔奉
修持值臣以王事征行未果前願俄嬰疾恙奄此淪亡
抱幽懇而莫伸念冥闕而增恨伏惟三尊慈憫衆聖哀

憐曲迴鑒祐之恩特降遷昇之澤俾其魂魄得契皈依積
生之寃債銷平在世之罪瑕蠲釋拔度幽泉之苦獲居
善爽之中道力玄功常加護祐其亡女所修寫法錄道
衣等謹於道場前焚燒上奏伏惟至聖鑒照愚衷勅其
魂神開度領受臣不任瀝懇虔祈哀痛迫切之至謹詞

天冊巡官何文濟為東院生日齋詞

臣聞天地分靈君臣定位必資輔贊用致昇平猶風虎
以相須若雲龍而感契由是吹塵入夢諭鼎膺求審象

生賢熊氏卜臯夔之旦堯歷元凱虞朝齊軒后之風莫
不輝灼帝圖光昭史筆以康億兆以福寰區今屬歲紀
壬辰日乘庚午朔居天候月合水衡凝南斗之禎休集
東陵之瑞彩景風八律星火開祥誕昴降嵩允當令序
叨脩青襟之列輒祈玄聖之恩虔詣華壇願崇鴻福蘭
缸夜燭檀穗朝飛仰陳三奏之儀必達九天之鑒伏冀
青函紫筆延生題東極之書絳簡朱編得道著南昌之
籍壽同山峻祿並海深樂境增澄萊衣顯德雁序繼三

台之美鯉庭超七葉之雄陶冶九圍匡扶元聖政歸一
統俗洽大同普覃夷夏之方永鎮雍熙之化臣某受恩
隆異省已虛辱唯叩靈真曾明感激不任瀝懇虔心歸
命之至謹詞

宣勝軍使王謹為亡男昭胤明真齋詞

伏聞大化無方神功廣被洞幽明而赴感普生死以垂
恩拯度無遺古今蒙澤臣頃者專征北陸統領師徒橫
黑稍以臨戎誓傾臣節奮凋戈而効命志洗國讐山川

有登涉之遙糧饋有輓輸之重惟期辦集正切憂兢又
一軍之人苦於瘡痍死傷枕藉相望道途兼小男昭肩
疾恙所嬰性命懸迫發丹誠而啓願冀玄聖之鑒臨尋
遂迴戈免貽曠闕再朝丹陛祇奉皇慈恭荷道恩敢申
昭謝是用按洞玄器格披靈寶典儀考九幽長夜之科
導玉匱明真之式精修齋直上答靈慈伏冀三界昭臨
諸天憫護賜九玄七祖超苦趣於幽闕眷屬親緣享福
祥於昭代臣積生夙咎徃世冤仇及生務已來公私負

犯或賞刑不當或裁斷失宜俗有怨嗟過虧陰騭致使
動貽障塞莫值亨通晝夜循懷常增憂惕因今齋謝並
乞懺除亡男昭肩未及壯年飄魂異境憫其淪謝慈痛
尤深或有邪沴侵傷或是幽靈拘制虔祈道力俾遂生
神度南丹流火之庭昇上境羽陽之府參玄證品悟道
登真罪咎蠲除寃債和釋臣等災纏超解厄運清消祿
秩壽涯更期延益惟勤誠節永酬聖主之恩克勵焚修
仰副真靈之祐

王承鄴為亡考修明真齋詞

伏聞至道開圖三尊垂教惠覃幽顯澤洽死生遊觀八
門播弘慈而濟苦憫傷幽夜迴法炬以流光南宮闢鍊
化之庭丹簡啓超昇之籍上智童子願開罪福之由飛
天神人請示懺陳之品敷明真典拔度幽關披玉匱
靈科解銷考對玄清昏翳灑潤焦勞拯拔窮魂咸為善
爽終天載劫洪沐玄慈臣先考運遇道風常參寶錄身
逢聖日累踐官榮處世網之中寧無過悞履塵寰之內

必有愆違况職主庖羞須行宰戮旋司戎伍每舉刑章
出領郡符入居近密或抑強撫弱或三令五申既與重
輕即為讐咎又自鄉關隔越兵火亂離故里墳塋或有
侵毀塚訟延注逮及子孫兼割貨所居移易門巷土木
修造有觸神明以此憂惶皆祈懺謝是敢遵靈寶科格
修明真道場精潔香燭豐嚴信幣披心露懇悔過希恩
伏惟太上三尊十方衆聖神光下燭惠渥滂流赦先考
累世以來深殃積罪削名地簡濯質天衢故傷誤殺之

愆往債前寬之日後嗣考延之咎先人怨責之瑕並賜
原除內外清淨即乞踈神丹霍列籍青華不經於岱嶽
鄴山克證於福堂天路上願九玄開度七祖超昇墳墓
安寧地冥替靜三途六趣共洽勝功內族外親俱臻景
祐刺心投血拜手祈天不任號殞激切涕咽之至謹詞
皇太子晏諸將祈晴感應靈寶詞

蓋聞至道應機有同響答明神赴感無異影隨緬維幽
贊之私每荷垂休之力六月二十二日皇太子之會諸

將已上卜吉辰方當暑雨之時遂有暗明之禱果蒙靈
貺叶此誠祈不移頃刻之間驟止滂沱之勢羣山曉碧
天高而屏翳收雲六合風清日迫而曦和弄轡譙筵克
脩中外同歡今則旋整車徒爰申弔伐千軍雷動山川
絕泥潦之虞萬馬星馳戈甲擢晶熒之色佇平兌梗大
拯黎元思答真官式陳齋薦蓮燈夜簇蘭穗朝飛儀禮
精嚴香花紛郁必達清都之聖更崇紫府之勲仰叩玄
功以昌鴻業不任虔祝之至謹詞

皇帝為老君修黃籙齋詞

蓋聞混漠之先希夷之表厥惟至聖光宅九清敷澹然
冲寂之宗行不事無為之教上自三古旁逮萬區欽若
真風贊孚成化粵自經綸之始洎膺推戴以來常慊明
誠每申瞻奉而光靈累洽禎貺繼臻仙居賜受命之符
顯隆基業宣室發祝祈之念必至感通由是風雨常均
氛邪不起四封無警百穀常登祇荷恩休實思昭謝爰
因令序特啓齋壇三日精嚴六時蠲潔冀憑闕奏上答

玄功今則方命師徒將平允醜猶資道力俾殄梟巢借
豐隆列缺之威掃鑿齒貪狼之族更垂熹祐永泰稟瀛
不任祝望之至謹詞

蜀州孟駙馬就衙設消災遷拔黃籙道場詞

臣聞至道深微玄功廣大包萬天而布化周品彙以流
恩故能下拯冥關廣寧邦國鎮安土地和喻神明皆遵
宰制之歡盡悅慈悲之力古今共稟幽顯無遺臣夙奉
玄休早承皇澤未展涓埃之効驟叨符竹之榮况累掌

重難兼司刑憲詳評獄訟慮垂仁恕之規主領兵師實
寡訓齊之要動貽過咎常切兢憂自臨蒞郡城每懷兢
慎遽鍾殃罰敢望生全禮制所拘殞絕無所偷延視息
又降渥恩泣血籲天笄笄何訴竊聞玄元啓教紫陽有
遷拔之儀正一垂科黃錄有懺祈之路是敢肅嚴公署
崇設齋壇拜表九清騰詞三界伏冀三尊衆聖宏憫濟
之慈悲夜府泉扃遂超昇之徑路賜鄖國夫人某氏神魂
安泰福善資薰積過深瑕皆從蕩滌不拘地府徑上天

堂七祖九玄前亡往逝俱昇道力齊會福庭又宅宇之
卜累經修改恐因觸動未獲安寧願憑齋謝之緣旁解
犯違之過龍神復位土地安和居止利宜凶災銷殄城
隍社廟里域真官密享神功永居福地上願帝圖隆固
聖壽延洪太子諸王擁宏休而奉國后妃嬪主承景貺
以匡朝中外寮臣六軍萬姓同歡昌運克遂安貞歲有
豐登俗無疵癘率土之內一統萬方並臻仁壽之鄉咸
本昇平之化不任歸命披心虔誠懇願之至

邳州刺史張太博敬周為鶴鳴化枯栢再生修金
錄齋

伏聞至道玄通神功廣運裁成天地敷讚帝王羲軒巢
燧之君堯舜禹湯之主莫不師資冲漠啓迪雍熙致祚
歷之龐洪俾聲名之振赫或乘颺滄海或證品紫庭光
燭九遐壽均三景伏惟大蜀皇帝乘樞御運握斗披元
執大象而撫華夷駕六龍而綏億兆德逾堯禹聖越羲
皇穹廬窮髮之君奉琛向化廣漢渥洼之境重譯來賓

澤浸山川仁覃草木靈禽棲於內苑嘉獸宅於上林三
秀呈祥十朋表異而猶勞謙恭已讓德於天符將溢簡
編益深於撫挹今則神明幽贊靈化垂休渥澤潤洽於
朽根枝幹再榮於枯栢風來翠壁重飄遠近之香月過
華壇復覩扶踈之影其為嘉瑞實冠古先有以見天枝
帝葉之繁昌聖壽寶圖之永遠雖禾生清廟莫吐彤庭
徒美前聞難偕聖感臣榮逢昌運叨領郡符屬邑之中
覩茲上瑞藻繪朝陳於龍闕絲綸夕降於鳳牋旋錫御

詞嚴申醮祝褒稱顯煥榮耀優隆量恩而溟海未深荷
聖而乾坤難報敢因皇帝本命之日修金籙道場翹罄
丹襟仰祈宏貺伏冀諸天降鑒萬聖照臨流巨福於社
稷尊靈增景祐於宗祧先聖二儀並固萬國同文皇帝
壽等岷峨明齊日月普頌正朔一統寰瀛皇后受福紫
宸增齡丹錄皇太子永扶皇極養德青宮公主嬪妃榮
匡聖日諸王百辟欽贊皇基九土安康五兵韜戢烟塵
殄息稼穡豐登動植飛沉三途六趣俱承惠渥咸詣福

庭臣誓傾忠孝之規上答聖明之澤

廣成集卷五